

UVODNIK

UVODNIK

Prvi broj časopisa Udruženja Ilmijje *Novi Muallim* izašao je iz štampe 6. aprila 2000 godine. Podnaslov Časopis za odgoj i obrazovanje pobliže određuje njegovu primarnu orijentaciju i zadatak. Do danas je štampano 50 brojeva časopisa sa 832 teksta. Časopis izlazi tromjesečno. Prvih 36 brojeva kao glavni urednik potpisivao je prof. Dževad Hožić, a posljednjih 16 brojeva uređuje Meho ef. Šljivo. Tekstovi, osvrti, prijevodi, prilogi i članci Novog Muallima raspoređeni su u stalne rubrike: **Uvod**, rubrika koja sadrži najavni tekst o temi i sadržaju broja koju potpisuje urednik ili član redakcije, **rubrika Sagledavanja** sadrži aktuelne autorske tektove bosanskohercegovačkih alima o različitim, naučnim, stručnim i konkretnim životnim pitanjima i temama, zatim rubrika **Putokazi** koja je, kako to sam njen naslov govori, predviđena za tekstove angažiranih autora koji iznose i predstavljaju drukčije poglede, nove ideje i pristupe u objašnjavanju važnih islamskih ili općih društvenih i kulturnih tema. U rubrici **Muallim** najčešće objavljujemo stručne pedagoške i metodičke tekstove imama i vjeroučitelja, kao i njihove pismene i multimedijalne pripreme za nastavni vjeronaučni i mektebski sat. Ova rubrika je svojevrsni most ka boljem međusobnom razumijevanju i kvalitetnijoj saradnji mualima koji poučavaju u mektebima i vjeroučitelja koji tumače vjerkse i etičke teme u školskim učionicama. U svrhu popularizacije časopisa među imamima i ostalim uposlenicima Islamske zajednice redakcija Muallima je inicirala pokretanje rubrike **Forum**, koja je prvotno zamišljena kao otvorena medijska kritička i dijaloška arena u kojoj se u demokratskom duhu i cijeneći pluralizam mišljenja raspravlja o svim važnim organizacijskim i strateškim pitanjima Islamske zajednice. U Muallimovom forumu pored autora uvodnih tekstova koji kao polaznu osnovu za diskusiju objavljuju stručne i istraživačke osvrtne može učestvovati svaki uposlenik Islamske zajednice, imam, vjeroučitelj ili pak obični čitalac koji osjeća potrebu da o određenoj relevantnoj temi iznese svoj stav i mišljenje. U forumu smo otvarali centralna pitanja sa kojima se susreću imami u svome imamskom pozivu i misijskom djelovanju. Tako smo, između ostaloga, istraživali i diskutirali o temi ima li Islamska zajednica strategiju na osnovu koje planira upis studenata na visokoškolske obrazovne institucije i njihovo adekvatno zapošljavanje u strukturama Islamske zajednice. Mlade muslimanske teologinje, intelektualke i aktivistice Muallimov forum su iskoristile da direktno i argumentirano progovore o nužnom inovativnom pristupu rješavanju mjesta i uloge žene u Islamskoj zajednici. Zahvaljujući Forumu Novog Muallima našim čitateljima omogućili smo da pravovremeno dobiju cjelovitije i objektivnije informacije o tzv. arapskom proljeću, dok smo u rubrici intervju objavili razgovore sa nekim najreferentnijim muslimanskim misliocima danas poput svjetski poznatog i utjecajnog savremenog alima Tarika Ramadana. Po dubini i opsegu intelektualnog uvida i poznavanju i elaboraciji teme suodnosa i prožimanja vjere i politike intervju sa Hilmom Neimarlijom koji smo objavili u prošlom pedesetom broju zacijelo predstavlja antologijsku vrijednost. To, uostalom dodatno potvrđuje i činjenica da je ovaj intervju u cijelosti preuzeo i objavio dnevni list Oslobođenje. Uloga, značaj i doprinos časopisa *Novi Muallim* u edukaciji i prosvjeti imamsko-muallimskog kadra kao i značaj ovog renomiranog časopisa za bosansko-hercegovačku naučnu i kulturnu javnost nije do danas dovoljno istaknuta i valorizirana. U nedostatku kompetentne i objektivne analize sveukupnog ostvarenja ovog časopisa citirat ćemo navode iz jedne komparativne analize uzoraka rimokatoličke, pravoslavne i islamske štampe koja je objavljena u magazinu *BH Dani* (br. 553-18. JANUARA 2008 GOD.) „Muallim je islamski časopis za odgoj i obrazovanje i zaista zavređuje taj naslov. Pored zaista kvalitetnih priloga o egzegezi Kurana, sociološko-istorijskih i filozofskih eseja u duhu islama, u njemu se objavljuju i prevode strani tekstovi, kako muslimanskih tako i nemuslimanskih autora, što ga čini korisnim studentima svih humanističkih nauka.“

Redakcija Novog Muallima, naši vjerni saradnici, glavni Odbor Udruženja ilmijje najzaslužniji su za kvalitetnu koncepciju i sadržaj časopisa kojeg krasi stoljetna tradicija. Kao glavni urednik odgovorno i ponosno tvrdim da niko od nosilaca vjerskog autoriteta u Islamskoj Zajednici nikada nije pokušao da u Muallimu zavede minimum cenzure ili autocenzure. To je Udruženju ilmijje pomoglo da zadrži status ozbiljne i vjerodostojne Institucije koja se hvala Bogu ne mora stiditi zbog vlastitog djela, jer na stranicama njenog zvaničnog časopisa nije kompromitirala ni sebe ni druge.

Meho ŠLJIVO

(tekst je pročitao na svečanoj Akademiji Udruženja ilmijje 3. oktobra 2012. u Gazi Husrevbegovoj biblioteci)